

■ TRIBUNA POLITICA

Rinforzar l'energia idraulica ed ils tschains d'aua

DA SILVA SEMADENI,
CUSSEGLIERA NAZIUNALA PS/GR

La producziun electrica cun forza idraulica è sut squitsch en Svizra. Ils pretschs per l'electricitat sin il martgà europeic èn crudads ils ultims onns fermamain. E dapi la liberalisaziun parziala en Svizra en il 2009 pon cumprar clients gronds cun in consum annual da pli che 100 000 kWh lur energia libramain sin il martgà europeic. Sco ils turists da cumpra profitan els da la purschida la pli favuraivla – quai è oz il pli savens l'energia nuschaivla da charvun. Sper il clima èn pericitads uschia er la forza idraulica ed ils tschains d'aua.

Sulettamain ils clients che retschaivan lur electricitat dal provedider da basa local e che na dastgan betg acquistar quella sin il martgà liber cumpran forza idraulica. Var 50% da la forza idraulica svizra vegg furnida uschia a las chasadas ed interpresas pitchnas. La pressiun sin il pretsch al martgà d'electricitat resta dentant tuttina.

Grazia a la strategia d'energia 2050 survegnan las ovras idraulicas fin il 2023 in agid transitorio, ina premia da martgà, sch'ellas ston vender lur electricitat sut il pretsch da producziun sin il martgà liber. Tanscha quai?



Na. La forza idraulica è la pli impurtanta pitga da noss provediment electric. Ils implants existents produceschan var 60% da noss basegn da forza electrica – energia fidaivla, favuraivla e netta. Per surmountar la situaziun actuala da pretschs bass duvrain nus ulteriuras mesiras.

Per savair prender las mesiras gistas ston ins crear però l'emprim transparenza. Igl è malonest sche las grondas firmas d'electricitat decleran adina puspè la forza idraulica sco nunrentabla, fertant ch'ellas zuppantan ils vairs custs da la forza atomara. La forza idraulica na dastga betg vegin utilisada ni per sanar ils concerns electrics ni per subvenziunar la forza atomara.

Mesiras ston avair cle- ras intenziuns, sco la proposta che vegg tractada l'emna proxima en il cussegl naziunal: En il prove-

diment da basa stuess vvenir consumà sulettamain energia indigena renovabla. Il cussegl federal garantiss che las tariffas da l'electric restian commensuradas. Ina tala decisiun vegniss ad augmentar la dumonda per energia idraulica, a confermar la volontad actuala da la pli gronda part dals consuments ed a satisfar a la gronda part da la clientella en il provediment da basa senza gronds augments dals pretschs.

In'ulteriura mesira concreta pertutga la valur dals lais da fermada. Els garanteschan la segirtad dal provediment electric da l'entir pajais, spezialmain durant l'enviern. Questa reserva strategica vegg ad esser en l'avegnir anc pli impurtanta. Ilos custs per ina tala reserva strategica ston ins garantir sco servetsch da sistem electric e vegin pajads da tut ils consuments, damai era dals consuments gronds. Il provediment electric restass tuttina favuraivel.

Idovra ulteriuras mesiras concretas, acceptablas per la maioritad, per rinforzar la forza idraulica. Ed idovra dentant er la prontdad da pajar er in pretsch commensurà. Ma sche la forza idraulica vegg rinforzada, lura pudainsa salvar ils tschains d'aua actuals e far frunt al squitsch enorm che vegg da Berna.